



4 | Cairt Íospartach Oifig an
Stiúrthóra Ionchúiseamh Poiblí
(DPP)

4: Cairt Íospartach Oifig an Stiúrthóra Ionchúiseamh Poiblí (DPP)

CONAS A FHREASTALÓIDH AN STIÚRTHÓIR IONCHÚISEAMH POIBLÍ (DPP) ORT

Más íospartach tú féadfaidh tú iarraidh orainn:

- do dhearcadh a chur san áireamh agus cinneadh á dhéanamh againn ar chóir ionchúiseamh a dhéanamh;
- breathnú arís ar chinneadh a rinneamar nach n-aontaíonn tusa leis.

Más duine de do theaghlach nó den líon tí é an t-íospartach i gcás marfach, féadfaidh tú iarraidh orainn agus inseoimid duit:

- an fáth atá leis, nuair is féidir é, má shocraímid gan ionchúiseamh a dhéanamh. Déanfaimid é seo i gcásanna in ar tharla an marú ar an 22 Deireadh Fómhair 2008 nó dá éis.

Más finné tú:

- caithfimid leat le hómós agus cuirfimid do staid phearsanta, do chearta agus do dhínit san áireamh;
- oibreoimid leis na Gardaí chun a chinntiú go gcoinnítear suas chun dáta tú ar do chás, go háirithe más coir ghnéasach nó fhoréigineach atá i gceist; agus
- socróimid go labharfá le hatarnae agus le habhcóide an ionchúisimh sula dtosaíonn an cás cúirte, más mian leat é. Míneoidh siad cad a tharlóidh sa chúirt ach ní féidir leo labhairt leat faoin bhfianaise a thabharfaidh tú.

Má tá téarma príosúnachta gearrtha ar an gcúisí, féadfaimid:

- iarraidh ar an gCúirt Achomhairc Choiriúil athbhreithniú a dhéanamh ar an bpianbhreith má cheapaimid go bhfuil sé róthrócaireach – i bhfocail eile, go bhfuil sé chomh héadrom sin go bhfuil sé mícheart sa dlí. Féadfaimid athbhreithniú ar phianbhreitheanna a lorg ón bPríomh-

Chúirt Choiriúil, ón gCúirt Chuarda Choiriúil agus ón gCúirt ChoiriúilSpeisialta. Ní féidir linn achomharc a dhéanamh ar phianbhreith ón gCúirt Dúiche.

MURA MBÍONN TÚ SÁSTA LEIS AN TSEIRBHÍS CAD IS FÉIDIR A DHÉANAMH

Má bhíonn ceisteanna nó gearáin agat faoinár seirbhís, féadfaidh tú dul i dteagmháil leis:

An Stiúrthóir Ionchúiseamh Poiblí

14 - 16 Sráid Mhuirfean

Baile Átha Cliath 2.

Teil: (01) 678 9222

Faics: (01) 661 0915

Láithreán Gréasáin: www.dppireland.ie

Féadfaidh tú freisin cuairt a thabhairt ar ár láithreán gréasáin agus teacht ar ár

- leabhrán eolais ar Ról an DPP; ;
- leabhrán eolais ar Dul chun na Cúirte mar Fhinné;
- Treoir Achomair ar an gCóras Ceartais Choiriúil; agus
- Roinn ar Íospartaigh agus ar Fhinnéithe.

RÓL OIFIG AN DPP

Nuair a thugann tú tuairisc faoi choir thromchúiseach, déanfaidh na Gardaí a imscrúdú agus cuirfidh siad comhad chuig Oifig an DPP. Léifimid an comhad sin ansin féachaint an bhfuil go leor fianaise ann chun duine a chúiseamh sa choir agus cad é an cúiseamh ar chóir a bheith ann.

Cinneadh ar cheart ionchúiseamh a dhéanamh

Is cinneadh tromchúiseach é an cinneadh ionchúiseamh a dhéanamh – féadfaidh sé buantionchar a bheith aige ar íospartach na coireachta agus ar an té a cúisíodh araon. Is é an DPP amháin nó duine dár ndlíodóirí ar féidir leo

cinneadh a dhéanamh i gcásanna tromchúiseacha – mar shampla, dúnmharú, coireanna gnéasacha nó timpistí marfacha bóthair.

D'fhéadfadh go ndéanfadh na Gardaí cinneadh ionchúiseamh a dhéanamh i gcoireanna nach bhfuil chomh tromchúiseach. Ach fós féin tugtar an t-ionchúiseamh ar aghaidh in ainm an DPP agus tá sé de cheart ag an DPP a rá leis na Gardaí cén chaoi le déileáil leis an gcás.

Feidhmímid go neamhspleách agus cinneadh á dhéanamh faoi ar chóir ionchúiseamh a dhéanamh. Ciallaíonn se seo nach féidir le duine ar bith eile, an Rialtas féin fiú, a rá linn ar chóir ionchúiseamh a dhéanamh i gcás, nó nár chóir.

Gan ionchúiseamh a dhéanamh

Má chinnimid gan ionchúiseamh a dhéanamh, ní thabharfaimid na cúiseanna ach do na Gardaí a d'imscrúdaigh an cas. Ach, nuair is féidir, tabharfaimid cúiseanna i gcásanna marfacha do dhuine de theaghlach nó de líon tí an íospartaigh, má iarrann siad orainn. Déanfaimid é seo i gcásanna in ar tharla an marú ar an 22 Deireadh Fómhair 2008 nó dá éis.

Coireanna á n-ionchúiseamh sa chúirt

Inseoidh na Gardaí duit cibé ar shocraíomar ionchúiseamh a dhéanamh agus, má shocraigh, cathain agus cén áit a mbeidh an cas cúirte ar siúl.

Éistear na cásanna is tromchúisí sa:

- Phríomh-Chúirt Choiriúil,
- Chúirt Chuarda Choiriúil; nó
- sa Chúirt Choiriúil Speisialta.

Sna cásanna sin, déanfaidh dlíodóir ag feidhmiú thar cheann an DPP an cas a ionchúiseamh sa chúirt.

Éistear cásanna nach bhfuil chomh tromchúiseach sa Chúirt Dúiche. Sna cásanna seo déanfaidh na Gardaí nó dlíodóir ag feidhmiú thar cheann an DPP an cas a ionchúiseamh sa chúirt.

(Eagrán: Meitheamh, 2010)